

# Gönguferðir í Hrunamannahreppi 2020

Atvinnu-, ferða- og menningarnefnd Hrunamannahrepps kynnir hér gönguferðir sumarsins 2020. Þetta er nítjándi sumarið sem boðið er upp á þessar ferðir. Ferðirnar eru alls átta. Allar göngurnar verða á miðvikudagskvöldum í sumar nema gangan 18. júní sem er fimmtudagur og dagsgöngurnar 18. júlí og 29. ágúst sem eru farnar á laugardögum. Frítt er í allar göngurnar en innheimt verður fyrir leiðsögn/akstur í dagsgöngurnar. Leiðsögumenn í ferðunum í samvinnu við heimafólk verða þau Helgi Már Gunnarsson og Kolbrún Haraldsdóttir, Flúðum. Allir eru hjartanlega velkomnir.

Allar ferðir verða auglýstar sérstaklega þegar nær dregur á facebooksíðunni **“Gönguferðir í Hrunamannahreppi”**.

## **1. ferð er 27. maí. Hrepphólar – Hólahnjúkar**

Lagt af stað frá Hrepphólakirkju kl. 20:00 og gengið í kringum Hólahnjúka sem eru stórkostlegir stuðlabergshnúkar. Endað við Hrepphólakirkju. Þetta er létt og skemmtileg leið sem er mikil náttúruperla. Hér er notalegt að eiga góða kvöldstund í fallegu umhverfi. Jóna Heiðdís Guðmundsdóttir í Áshlíð mun leiða gönguna. Áætlaður göngutími er u.þ.b. 2 klst.

## **2. ferð 3. júní. Bryðjuholt - Ásaganga**

Lagt af stað kl 20:00 frá hlaðinu í Bryðjuholti. Þaðan er gengið upp á bæjarásinn, upp á Eldavél, og notið útsýnisins. Síðan er gengið aftur niður og stefnan sett á Bryðjuholtsmúla og gengið eftir honum endilöngum í átt að Flúðum. Gott útsýni er af múlanum og hugsanlega má sjá álftapar með unga synða á tjörn sem leynist bak við Bryðjuholtsmúla. Gengið eftir kóngsveginum til baka. Þægileg ganga í grónu landi en getur verið aðeins blaut. Þórunn, Samúel og Daði í Bryðjuholti munu leiða gönguna. Áætlaður göngutími er u.þ.b. 2 klst.

## **3. ferð 10. júní. Langholtsfjall – Tæpastígur - Álfaskeið**

Lagt af stað kl 20:00 frá Ásatúni og gengið göturnar austan undir Langholtsfjalli. Eftir þægilega göngu á reiðgötum er gengið upp eftir Tæpastíg og komið á hinn þekkta samkomustað Álfaskeið. Þaðan er haldið áfram upp að sjónvarpsmöstrunum en þaðan er frábært útsýni til allra átta. Þaðan er síðan haldið aftur niður að Ásatúni. Ganga sem tekur u.þ.b. 2 klst.

## **4. ferð er 18. júní (fimmtudagur). Svartárgljúfur - Tungufellsskógur**

Mæting við gamla gerðið í Tungufellsdal kl. 20:00. Þaðan er gengið í gegnum ilmandi skóginn í Tungufellsdal og Svartárgljúfur skoðað en í því er mjög fallegur foss. Einnig verður boðið upp á að ganga upp á Tófuhól en þaðan er víðsýnt. Elín Jóna Traustadóttir og Svanur Einarsson í Tungufelli munu leiða gönguna. Létt og auðveld ganga sem tekur u.þ.b. 2 klst.

### **5. ferð er 24. júní. Laugar - Gildurhagi**

Lagt af stað kl 20:00 frá hlaðinu á Laugum. Þetta er létt og skemmtileg leið inn í Gildurhaga sem er mikil náttúruperla. Sagan af Sængurkonukletti verður rifjuð upp. Hér er notalegt að eiga góða kvöldstund í fallegu umhverfi. Létt og auðveld ganga sem tekur u.þ.b. 2 klst.

### **6. ferð er 18. júlí. Fosslægur – Ábóti – Svínárnes. Dagsganga**

Þetta er dagsganga, 15-18 km. Ekið er inn í Fosslæg þar sem gangan hefst. Gengið er í Ábótaver og að fossinum Ábóta í Hvítá en hann fellur í gljúfri sunnan undir Bláfelli. Þaðan verður gengið í Svínárnes. Gönguleið er mikið til á grónu landi en gera má ráð fyrir að þurfa vaða ár og sprænur. Gangan er hugsuð sem náttúruskoðun og mun Sigurður H. Magnússon á Högnastöðum fræða göngufólk um gróðurfar og staðhætti en hann hefur stundað gróðurrannsóknir á afréttinum um árabíl. Ferðin er í samstarfi við Landgræðslufélag Hrunamanna. Athugið að það þarf að panta í þessa ferð í síma 6923882/6995178. Gera þarf ráð fyrir einhverjum kostnaði vegna aksturs sem verður auglýstur þegar nær dregur.

### **7. ferð er 12. ágúst. Þórarinsstaðir – Háhnjúkur – Hildarsel – Þórarinsstaðir**

Lagt af stað kl. **19:00** frá Þórarinsstöðum. Þaðan er gengið á Háhnjúk. Útsýnið þaðan er glæsilegt þó að það ráðist augljóslega af veðri. Þaðan verður gengið niður í Hildarsel sem er eyðibýli og er nú orðið hluti af landi Berghyls. Í Hildarseli eru tóftir eftir búsetu, sem og Hildarselsfoss í Litlu-Laxá en foss þessi fær gjarnan önnur heiti þegar um hann er rætt. Ef tími gefst til má skoða annan foss rétt ofar í ánni. Síðan er gengið til baka að Þórarinsstöðum. Áætlaður göngutími er u.þ.b. 3 klst. Gangan hefst á langri brekku upp að Háhnjúki en eftir það ætti gangan ekki að vera erfið. Kristín Erla Ingimarsdóttir á Þórarinsstöðum og Sigurjón Snær Jónsson á Berghyl leiða gönguna.

### **8. og síðasta ferð sumarsins 29. ágúst er Stóra-Laxárgljúfur ganga**

Þetta er dagsganga, u.þ.b. 16 km. Ekið er inn á afrétt Hrunamanna og gengið niður með hinu stórkostlega gljúfri Stóru-Laxár en það er rómað fyrir náttúrufegurð. Endað er við bæinn Kaldbak. Ógleymanleg ganga og er hugsuð sem náttúruskoðun. Gangan er í samstarfi við Upplit menningarklasa uppsveita Árnessýslu. Athugið að það þarf að panta í þessa ferð í síma 6923882/6995178. Gera þarf ráð fyrir einhverjum kostnaði sem verður auglýstur síðar er hann fyrir akstri og leiðsögn.

